

արկածներ իր ճանապարհորդություններից, պատմում էր, թե ինչ էր տեսել եւ ինչ էր արել զանազան երկրներում, խօսում էր Հայրիկի մասին, նրա աշխատությունների մասին, խօսում էր տեղային քահանաների տգիտութեան մասին, եւ նրա խօսակցությունները այնքան հետաքրքիր էին, որ բոլորը ես մեծ ուրախութեամբ լսում էի:

– Դուք կարծում եք տիկինը կարո՞ղ է գալ, – հարցրեց Ասլանը քահանայից, ընթրիքի սեղանը հաւաքելուց յետոյ:

– Կարող է, եւ անպատճառ այս գիշեր այստեղ կը լինի, – պատասխանեց քահանան վստահութեամբ:

– Բաւական դժոար կը լինի նրա համար... ինչպէ՞ս կարող է... – կրկնեց Ասլանը թերահաւատութեամբ...

– Նա իր բանը գիտէ... Նա այդ տեսակ գործերի համար բաւական խելք ունի... – ասաց քահանան:

Ասլանը մեծ անհամբերութեամբ սպասում էր մի տիկնոջ, այդ տիկինը տեր հօր քոյրն էր: Տեր հայրը իր հայրենիքից բացակայ գտնած ժամանակ, նրա տանը պատահել էր երկու անփոխարինելի կորուստ. մայրը վախճանուել էր, իսկ միակ քոյրը, անտէր մնալով, բռնութեամբ յափշտակուել էր եւ մի տաճկի ամուսին էր դարձել: Այդ յափշտակութիւնը, որովհետեւ երկրի սովորական դէպքերից մէկն էր, անցել էր խիստ ներողամտութեամբ հայ հասարակութեան կողմից. իսկ տեր հայրը, որ անչափ սիրում էր իր քրոջը, որպէս երեւում էր, չէր կարող մոռանալ այդ դժբախտութիւնը: Մահմեդականութիւնը շատ պայմաններ ունի, ոչ միայն օտարազգիներին ամենայն դրութեամբ որսալու, այլեւ նրանց թէ՛ կրօնապէս եւ թէ՛ ազգայնապէս իր հետ միացնելու: Այդ էր, որ անելի ցաւեցնում էր տեր հօրը: Մի հայ աղջիկ կամ տղայ, կամաւ, թէ ակամայ, երբ մահմեդականի հետ է ամուսնանում, այնուհետեւ կտրւում են նրա բոլոր յարաբերութիւնները իր ազգակիցների հետ եւ այլեւս իրան հայ կոչել չէ կարող: Մի հայի պատահելիս՝ նա իրաւունք չունի հայերէն խօսել. նա զրկւում է մինչեւ անգամ իր ծնողների տունը գնալուց. եւ «հայ» անունը նրա բերանում այնուհետեւ փոխւում է «գաւուր» անունով, որից պէտք է խորշիլ, որին պէտք է պիղծ համարել: Բայց տեր հօր քոյրը այդ մասին մի գեղեցիկ բացառութիւն էր կազմում. նա մնացել էր հաւատարիմ թէ՛ իր ազգին եւ թէ՛ կրօնին, թէեւ ամենայն զգուշութեամբ մահմեդականներից թաքցնում էր իր զգացմունքները: Նա սիրում էր իր եղբօրը եւ երբեմն գաղտնի կերպով գալիս էր նրա տունը, ուրախանամ էր նրա երեխաներով եւ փառք էր տալիս աստծուն, որ իր հօր տան օջախը իսպառ մարած չէր: